



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka ("Službeni glasnik BiH" broj 95/12), člana 24. Pravilnika o godišnjim finansijskim izvještajima političkih stranaka ("Službeni glasnik BiH" broj 61/06), a u skladu sa članom 12. Pravilnika o administrativnim procedurama pregleda, kontrole i revizije finansijskih izvještaja političkih stranaka ("Službeni glasnik BiH", broj: 103/08), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2011. GODINU POLITIČKE STRANKE „BOSS“ **BOSANSKA STRANKA - Mirnes Ajanović**

Broj: 03-07-6-362/12
Sarajevo, 30. januar 2013. godine

SADRŽAJ

MIŠLJENJE REVIZORA	3
1. UVOD	4
2. PREDSTAVLJANJE POLITIČKE STRANKE	4
3. OPIS PREGLEDA I KONTROLE FINANSIJSKOG IZVJEŠTAJA	5
Predmet pregleda i kontrole	5
Cilj pregleda i kontrole	5
Obim pregleda i kontrole	5
4. PRETHODNE KONTROLE I REVIZIJE	5
5. NALAZI I PREPORUKE	5
5.1. NALAZI.....	5
5.2. PREPORUKE	10

MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja političke stranke „BOSS“ Bosanska stranka - Mirnes Ajanović za 2011. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama tada važećeg Zakona o finansiranju političkih stranaka (“Službeni glasnik BiH” broj: 22/00, 102/09 i 54/10)¹ - u daljem tekstu Zakon o finansiranju i uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Na osnovu obavljenog pregleda godišnjeg finansijskog izvještaja, utvrđeno je da je „BOSS“ Bosanska stranka - Mirnes Ajanović u 2011. godini prekršila odredbe člana 8. stav (1) i člana 11. stav (1) i (3) Zakona o finansiranju.

Pregledom, odnosno kontrolom finansijskog izvještaja, osim gornje napomene, nismo zapazili ništa značajno, što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju.

¹ Dana 05.12.2012. godine stupio je na snagu novi Zakon o finansiranju političkih stranaka (“Službeni glasnik BiH” broj 95/12)

1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja političke stranke „BOSS“ Bosanska stranka - Mirnes Ajanović za 2011. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka (“Službeni glasnik BiH” broj: 61/06) i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka (“Službeni glasnik BiH” broj: 103/08).

Zbog činjenice da nije obavljena revizija u prostorijama političke stranke, postoji velika mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja „BOSS“ Bosanska stranka - Mirnes Ajanović ostvarila je ukupan prihod u iznosu od 227.145,38 KM, što je prikazano u narednoj tabeli:

Red. br.	Vrsta prihoda	Iznos u KM	Učešće u Uk.prih. %
1	Članarina	0,00	0,00%
2	Prilozi fizičkih lica	0,00	0,00%
3	Prilozi pravnih lica	0,00	0,00%
4	Prihodi od imovine	47,24	0,02%
5	Prihodi od pr.lica	0,00	0,00%
6	Prihodi od poklona	0,00	0,00%
7	Prihodi iz budžeta	227.098,14	99,98%
	Ukupni prihodi:	227.145,38	100,00%

U godišnjem finansijskom izvještaju politička stranka je iskazala ukupne rashode u iznosu od 229.230,95 KM.

2. PREDSTAVLJANJE POLITIČKE STRANKE

Naziv političke stranke je „BOSS“ Bosanska stranka - Mirnes Ajanović. Skraćeni naziv stranke je BOSS. Stranka je registrovana 08.05.2006. godine u Općinskom sudu u Tuzli pod brojem 032-0-REG-06-000792.

Sjedište BOSS – Bosanske stranke – Mirnes Ajanović je u Tuzli, ulica Kojšino broj 7.

Lice ovlašteno za zastupanje stranke je Mirnes Ajanović, predsjednik stranke.

Lice ovlašteno za podnošenje finansijskih izvještaja za 2009. godinu je Nedžad Zonić.

Prema podacima iz godišnjeg finansijskog izvještaja za 2011. godinu, „BOSS“ Bosanska stranka - Mirnes Ajanović ima slijedeće organizacione dijelove:

- Glavni odbor „BOSS“ Bosanske stranke - Mirnes Ajanović Tuzla,
- Regionalni odbor stranke Sarajevo – Goražde i
- 35 općinskih odbora.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj „BOSS“ Bosanske stranke - Mirnes Ajanović za 2011. godinu.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja navedenog zakona, ocjenjuje da li je potrebno izvršiti terensku reviziju da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

Obim pregleda i kontrole finansijskih izvještaja „BOSS“ Bosanske stranke - Mirnes Ajanović obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na prihode iz budžeta.

4. PRETHODNE KONTROLE I REVIZIJE

Pregled i kontrola finansijskih izvještaja „BOSS“ Bosanske stranke - Mirnes Ajanović kontinuirano su vršene u periodu od 2005. do 2010. godine. Pored pregleda i kontrole finansijskih izvještaja, koje je politička stranka dostavljala Centralnoj izbornoj komisiji BiH, izvršena je revizija finansijskih izvještaja za 2007. i 2009. godinu u prostorijama političke stranke. Nakon izvršenog pregleda godišnjeg finansijskog izvještaja za 2010. godinu, političkoj stranci je data preporuka da treba postupati u skladu sa odredbama člana 8. stav (1) i člana 11. stav (1) i (3) Zakona o finansiranju političkih stranaka.

Nerealizovane preporuke:

Na osnovu uočenih nedostataka u godišnjem finansijskom izvještaju za 2011. godinu, utvrđeno je da „BOSS“ Bosanska stranka - Mirnes Ajanović nije ispoštovala preporuke revizije.

5. NALAZI I PREPORUKE

5.1. NALAZI

- a) **Pregledom godišnjeg finansijskog izvještaja za 2011. godinu, utvrđeno je da je „BOSS“ Bosanska stranka – Mirnes Ajanović prekršila odredbe člana 8. stav (1) Zakona o finansiranju.**²

Glavni odbor političke stranke je poslovni prostor, koji je u općinskom vlasništvu, koristio pod povoljnijim uslovima, odnosno nižu cijenu zakupa u odnosu na druge korisnike, dok je drugi organizacioni dio stranke poslovni prostor koristio bez plaćanja bilo kave naknade.

² U članu 8. stav (1) tada važećeg Zakona o finansiranju političkih stranaka («Službeni glasnik BiH» broj: 22/00, 102/09 i 54/10), koji je bio na snazi do 04.12.2012. godine), propisano je da državni, entitetski i kantonalni organi, organi Brčko Distrikta BiH, organi općinskih i mjesnih zajednica, javne institucije, javna preduzeća, humanitarne organizacije, anonimni donatori, vjerske zajednice, kao i pravna lica u kojima uloženi javni kapital iznosi najmanje 25% ne mogu da finansiraju političke stranke.

U skladu sa navedenom odredbom, korištenje poslovnih prostorija u vlasništvu bilo kog nivoa vlasti, bez plaćanja zakupnine, političkim strankama je predstavljalo zabranjeni prilog.

- Općinski odbor „BOSS“ Bosanske stranke - Mirnes Ajanović je za svoj rad, bez plaćanja zakupnine, koristio poslovni prostor u vlasništvu Općine Donji Vakuf. Na Zahtjev Centralne izborne komisije BiH, Općina Donji Vakuf je dostavila akt broj: 02-05-01356/12 od 16.04.2012. godine u kome navodi da je „BOSS“ Bosanska stranka – Mirnes Ajanović koristila kancelariju površine 18,92 m², za koju u 2011. godini nije plaćala zakupninu³.

Odlukom o kriterijima i mjerilima dodjele u zakup poslovnih prostorija Općine Donji Vakuf, broj:01/1-31-207/03 od 17.02.2003. godine („Službeni glasnik o davanju u zakup općinskih poslovnih zgrada, poslovnih prostorija i garaža Općine Tuzla (“Službeni glasnik Općine Donji Vakuf”, broj 2/3), najniži iznos zakupnine za prostore u II zoni Općine Donji Vakuf iznosi 8,00 KM/m² korisne površine.

Korištenjem poslovnog prostora u 2011. godini bez plaćanja zakupnine, „BOSS“ Bosanska stranka – Mirnes Ajanović je ostvarila zabranjeni prilog u iznosu od 1.816,32 KM.

- Glavni odbor „BOSS“ Bosanske stranke - Mirnes Ajanović Tuzla je na osnovu Ugovora o zakupu poslovnih prostorija broj: 17-23-10622, zaključenim 27.11.2006. godine sa Općinom Tuzla, koristio poslovni prostor površine 98,76 m², uz mjesečnu zakupninu od 1,00 KM/m² i tavanačke prostorije površine 97,96 m², za koji je ugovorena mjesečna zakupnina od 0,50 KM/m².

Prema Odluci o davanju u zakup općinskih poslovnih zgrada, poslovnih prostorija i garaža Općine Tuzla (“Službeni glasnik Općine Tuzla”, broj 6/04), najniža cijena zakupnine u II zoni Općine Tuzla iznosi 6,00 KM/m². Istom odlukom je propisano da se za skladišni prostor koji predstavlja građevinsku cjelinu unutar poslovnih zgrada cijena zakupa umanjuje za 50%.

Korištenjem poslovnog prostora u 2011. godini po cijeni koja je ispod cijene utvrđene navedenom Odlukom, za ostale korisnike prostora na području Općine Tuzla, „BOSS“ Bosanska stranka – Mirnes Ajanović je ostvarila prilog Općine Tuzla u iznosu od 8.864,40 KM.

Obzirom na odredbe Zakona o finansiranju političkih stranaka, koji je bio na snazi u 2011. godini, za koju se vrši kontrola finansijskog izvještaja ove političke stranke, odnosno odredbu člana 4. stav (1), kojom je propisano da prilog političkoj stranci, između ostalog, podrazumijeva i pružanje usluga političkoj stranci pod uslovima kojima se ta stranka stavlja u povlašćen položaj u odnosu na druge i odredbu člana 8. stav (1), kojom je propisano da državni, entitetski, kantonalni organi i organi opštinskih i mjesnih zajednica ne mogu finansirati političke stranke, „BOSS“ Bosanska stranka - Mirnes Ajanović je korištenjem poslovnog prostora bez naknade u Donjem Vakufu i korištenjem poslovnog prostora u Tuzli pod povoljnijim uslovima od drugih korisnika, ostvarila zabranjen prilog i iznosu od 10.680,72 KM.

- b) „BOSS“ Bosanska stranka – Mirnes Ajanović je prekršila odredbe člana 11. stav (1) i (3) Zakona o finansiranju.⁴**

³ Općina u pomentom aktu navodi da je u prethodnom periodu političkim strankama koje koriste poslovne prostorije ponudila potpisivanje Ugovora o zakupu kancelarijskog prostora, ali „BOSS“ Bosanska stranka – Mirnes Ajanović do kraja 2011. godine nije prihvatila ponudu za potpisivanje ugovora.

⁴ U skladu sa odredbom člana 11. stav (1) tada važećeg Zakona o finansiranju političkih stranaka («Službeni glasnik BiH» broj 22/00, 102/09 i 54/10), koji je bio na snazi do 04.12.2012. godine), političke stranke su obavezne da vode evidencije o svojim prihodima i rashodima, a u skladu sa odredbom iz stava (3) istog člana, političke stranke podnose finansijski izvještaj u formi koju odobri Centralna izborna komisija BiH. Ista odredba, u Zakona o finansiranju političkih stranaka («Službeni glasnik BiH» broj 95/12) je propisana u članu 12. stav (1) i (3) Zakona.

Na osnovu finansijskog izvještaja i finansijske dokumentacije koju je na zahtjev Centralne izborne komisije Bosne i Hercegovine dostavila politička stranka, utvrđeno je da „BOSS“ Bosanska stranka – Mirnes Ajanović nije uspostavila potpune i tačne evidencije o svojim prihodima i rashodima, čime je prekršila odredbe člana 11. stav (1) Zakona o finansiranju. Obzirom da je politička stranka za sastavljanje finansijskog izvještaja koristila nepotpune i netačne evidencije iz poslovnih knjiga, finansijski izvještaj nije podnijela u skladu sa odredbama člana 11. stav (3) Zakona o finansiranju.

(1) U poslovnim knjigama niti u finansijskom izvještaju koji je podnijela Centralnoj izbornoj komisiji Bosne i Hercegovine, politička stranka nije iskazala pihod iz budžeta u iznosu od 8.153,44 KM, odnosno dio prihoda u iznosu od 6.797,77 KM koji je ostvarila iz budžeta Općine Novi Grad Sarajevo i prihod u iznosu od 1.355,67 KM koji je ostvarila iz budžeta Općine Kalesija.

- Na Zahtjev Centralne izborne komisije Bosne i Hercegovine Općina Novi grad Sarajevo je dostavila Akt broj: 05-14-1135/12 SK od 13.06.2012. godine, sa tabelarnim pregledom uplaćenih sredstva u periodu od 01.01. do 31.12.2011. godine u iznosu od 66.906,63 KM za finansiranje Kluba vijećnika „BOS“ Bosanske stranke – Mirnes Ajanović. U aktu se navodi da je jedna tranša, u iznosu od 6.797,77 KM, uplaćena 28.01.2011. godine na račun kod Sparkasse banke, broj: 1990000000000023 partija 29-10056-653838, dok je preostalih jedanaest tranši, u ukupnom iznosu od 60.108,86 KM, uplaćeno na transakcijski račun kod Sparkasse banke, broj 199-050-00527877-86.
- Na Zahtjev Centralne izborne komisije Bosne i Hercegovine Općina Kalesija je dostavila akt broj: 02/1-2-14-367/2. od 13.06.2012. godine u kome je navela da je za rad Kluba vijećnika „BOSS“ Bosanska stranka – Mirnes Ajanović – Samostalni vijećnici isplatila sredstva u iznosu od 4.067,00 KM, na lične račune tri vijećnika. Na transakcijski račun broj: 1321400205098437, otvoren kod NLB – Tuzlanske banke, za finansiranje vijećnika „BOSS“ Bosanske stranke – Mirnes Ajanović, predsjedniku Kluba isplaćena su sredstva u iznosu od 1.355,67 KM⁵.

Obzirom da u finansijskom izvještaju „BOSS“ Bosanska stranka – Mirnes Ajanović nije iskazala sve prihode, koje je ostvarila iz budžeta općina, prekršila je odredbe člana 19. Pravilnika o godišnjim finansijskim izvještajima političkih stranaka.⁶

(2) U poslovnim knjigama, a također i u finansijskom izvještaju koji je podnijela Centralnoj izbornoj komisiji Bosne i Hercegovine politička stranka nije iskazala potpune i tačne podatke o rashodima koje je ostvarila u 2011. godini. Uvidom u finansijsku dokumentaciju stranke, utvrđeno je da dio troškova nije iskazan, na isplate sredstava koja imaju karakter ličnih primanja nije obračunat niti iskazan trošak po osnovu poreza i doprinosa, dio troškova je pogrešno klasifikovan kao trošak propagande, dok je za veći dio troškova koje je politička stranka iskazala u poslovnim knjigama i finansijskom izvještaju utvrđeno da su nerealno iskazani, te se pouzdano može tvrditi da nisu nastali u svrhu obavljanja aktivnosti za političku stranku.

- U finansijskom izvještaju politička stranka nije iskazala trošak zakupnine za poslovni prostor koji je koristio njen organizacioni dio u Zavidovićima. Činjenica da politička stranka nema poslovne prostore u svom vlasništvu, a u finansijskom izvještaju je iskazala troškove grijanja kod organizacionog dijela stranke u Zavidovićima u iznosu od 492,93

⁵ Tri uplate u iznosima po 339,00 KM (15. februara, 21. aprila i 22. avgusta, a uplata u iznosu od 338,67 KM 01. decembra 2011. godine)

⁶ Pravilnik o godišnjim finansijskim izvještajima političkih stranaka („Službeni glasnik BiH“, broj 61/06)

KM, ukazuje da je BOSS“ Bosanska stranka – Mirnes Ajanović koristila tuđi prostor za koji nije plaćala zakupninu, usljed čega je ostvarila prihod u visini neplaćene zakupnine. U skladu sa odredbom iz člana 18. Pravilnika o godišnjim finansijskim izvještajima političkih stranaka „BOSS“ Bosanska stranka – Mirnes Ajanović je bila obavezna po navedenom osnovu iskazati nenovčanu donaciju, dok je u skladu sa članom 21. istog Pravilnika bila obavezana iskazati trošak zakupnine.

- „BOSS“ Bosanska stranka – Mirnes Ajanović je sa transakcijskog računa Regionalnog odbora stranke Sarajevo – Goražde, u 2011. godini izvršila isplate novčanih sredstava na tekuće, odnosno privatne račune osam fizičkih lica, vijećnika u Općinskom vijeću Novi Grad Sarajevo, u iznosu od 37.950,00 KM, a pri tome, obzirom da ta sredstva imaju karakter ličnih primanja, nije obračunala, niti je uplatila, a također nije ni u poslovnim knjigama i finansijskom izvještaju iskazala troškove po osnovu poreza i doprinosa u skladu sa poreznim propisima⁷.

Obzirom da je politička stranka sredstva, u svrhu plaćanja troškova političke stranke, isplaćivala osobama koje nisu uposlenici stranke i to na njihove tekuće račune, u skladu sa poreznim propisima, bila je obavezna obračunati i platiti porez na dohodak i pripadajući doprinos u skladu sa Zakonom o porezu na dohodak.

Obzirom da stranka nije obračunala porez i doprinose na pomenute novčane isplate, troškove u poslovnim knjigama i finansijskom izvještaju iskazala je u manjem iznosu za cca 7.500 KM.

- Uvidom u poslovnu dokumentaciju političke stranke utvrđeno je da „BOSS“ Bosanska stranka – Mirnes Ajanović uplatila sredstva na tekuće, odnosno privatne račune: Rasima Smajića, Harisa Plehe i Lejle Sokolović sredstva u iznosima po 7.000,00 KM, na račun Nermine Gušo iznos od 4.200,00 KM, na račun Seada Čardaklije iznos od 5.400,00 KM, račun Nedima Dizdarevića iznos od 4.800,00 KM i račun Bajre Bibera sredstva u iznosu od 1.200,00 KM. Pomenuta fizička lica su imala obavezu da mjesečno podnose specifikacije sa pregledom troškova koje su ostvarili obavljanjem aktivnosti za političku stranku.

Specifikacije troškova koje su prethodno pomenuti vijećnici mjesečno podnosili predsjedniku Regionalnog odbora „BOSS“ Bosanske stranke – Mirnes Ajanović Sarajevo Goražde, Esedu Radeljašu, radi pravljanja sredstva koja su isplaćivana na njihove tekuće račune u mjesečnim iznosima po 600,00 KM, sačinjene su na osnovu nevalidne dokumentacije, odnosno netačnih računa.

U specifikacijama troškova, koje je predsjednik pomenutog Regionalnog odbora odobrio, navodeći da su usluge obavljene, odnosno roba primljena, navedeni su računi za gorivo u iznosu od 28.482,82 KM. Uvidom u pomenute specifikacije troškova, Služba za reviziju je utvrdila brojne nepravilnosti:

- Kod Lejle Sokolović, koja je od „BOSS“ Bosanske stranke – Mirnes Ajanović primila sredstva u iznosu od 7.000,00 KM, specifikacijom troškova za period februar – juni 2011. godine pravedani su računi iz mjeseca oktobra 2010. godine u iznosu od 2.500,00 KM za njeno školovanje na Fakultetu političkih nauka; specifikacijom troškova za juli mjesec 2011. godine pravedani su računi za gorivo iz mjeseca novembra i decembra iste godine u iznosu od 599,00 KM; specifikacijom troškova za mjesec avgust pravedani su računi za gorivo iz mjeseca oktobra u iznosu od 100,00 KM; specifikacijom troškova za avgust i septembar pravedani su računi za gorivo iz mjeseca decembra u iznosu 1.202,00 KM i

⁷ Zakon o porezu na dohodak ("Službene novine Federacije BiH", br. 10/08, 9/10 i 44/11) i Pravilnik o primjeni Zakona o porezu na dohodak ("Službene novine Federacije BiH", broj: 67/08, 4/10, 86/10, 10/11, 53/11 i 20/2012)

- specifikacijom troškova za oktobar i novembar pravdani su računi za gorivo također iz mjeseca decembra u iznosu od 1.501,01 KM.
- Kod Nermine Gušo koja je od političke stranke na svoj tekući račun primila sredstva u iznosu od 4.200,00 KM, specifikacijom troškova za period februar – maj 2011. godine pravdan je račun u iznosu od 2.500,00 KM za njeno školovanje na Pravnom fakultetu; specifikacijom troškova za mjesec juli i avgust pravdani su računi za gorivo iz mjeseca oktobra i novembra u iznosu od 1.148,18 KM.
 - Kod Nedima Dizdarevića koji je od političke stranke na tekući račun primio sredstva u iznosu od 4.800,00 KM, kroz specifikaciju troškova za mjesec februar pravdani su računi za gorivo iz mjeseca marta u iznosu od 200,07 KM; specifikacijom troškova za mjesec mart pravdani su troškovi po računima za gorivo za mjesec april, maj i juni u iznosu od 185,00 KM i troškovi taxi prevoza u iznosu od 400,00 KM, specifikacijom troškova za mjesec april i maj pravdani su računi za gorivo iz mjeseca avgusta, septembra i oktobra u iznosu od 1.199,08 KM; specifikacijom troškova za mjesec juli, avgust i septembar pravdani su računi za gorivo iz mjeseca novembra i decembra u iznosu od 1.800,00 KM.
 - Kod Seada Čardaklije koji je od političke stranke na tekući račun primio sredstva u iznosu od 5.400,00 KM, specifikacijom troškova za mjesec april, maj i juni pravdan je račun za gorivo iz mjeseca jula u iznosu 20,01 KM; specifikacijom troškova za mjesec juli i avgust pravdani su računi za gorivo iz mjeseca septembra u iznosu od 100,00 KM; specifikacijom za mjesec septembar pravdani su računi za gorivo iz mjeseca oktobra i novembra u iznosu od 550,00 KM i specifikacijom troškova za mjesec oktobar pravdani su računi za gorivo iz mjeseca decembra u iznosu od 600,00 KM
 - Kod Bajre Bibera koji je od političke stranke na svoj tekući račun primio sredstva u iznosu od 1.200,00 KM, specifikacijom troškova za mjesec februar i mart pravdani su računi za gorivo koji su ispostavljeni u periodu od 09.06. do 13.10.2011. godine, u iznosu od 757,25 KM.
- Uvidom u pune naloge za putničke automobile, koje su popunjavali vijećnici iz ove političke stranke, utvrđeno je da su troškovi goriva iskazani u enormno većim iznosima u odnosu na prijavljene putne relacije.
- Na osnovu putnog naloga za mjesec avgust 2011. godine u kome su navedene putne relacije od 580 kilometara pravdani su računi za utrošeno gorivo u iznosu od 507,00 KM, dok su za loko vožnje od 200 kilometara u Sarajevu pravdani računi za utrošeno gorivo u iznosu od 125,00 KM.
 - Na osnovu putnog naloga za mjesec novembar za putne relacije od 700,00 kilometara pravdani su računi za utrošeno gorivo u iznosu od 440,00 KM i za putne relacije od 620 kilometara pravdani su računi za utrošeno gorivo u iznosu od 610,00 KM.

Tri putnička vozila koja su vijećnici koristili za obavljanje aktivnosti za RO „BOSS“ Bosanska stranka – Mirnes Ajanović za Sarajevo – Goražde, te je po tom osnovu politička stranka isplatila sredstva u iznosu od 28.482,82 KM na ime utrošenog goriva, iznajmljena su od Eseda Radeljaša, predsjednika pomenutog regionalnog odbora uz mjesečnu cijenu zakupa od 1.500,00 KM, dok su dva vozila iznajmljena od vijećnika u Općinskom vijeću Novi Grad Sarajevo, Rasima Smajića i Harisa Plehe uz mjesečne cijene zakupa po 750,00 KM.

Činjenica da je „BOSS“ Bosanska stranka – Mirnes Ajanović korištenjem tri putnička vozila, od strane vijećnika iz RO stranke Sarajevo- Goražde, ostvarila troškove u iznosu od 67.246,57 KM i to 35.500,00 KM isplatom zakupnine za korištenje vozila i 3.263,75

KM za njihovo održavanje, te isplatom sredstava vijećnicima za utrošeno gorivo u iznosu od 28.482,82 KM, ukazuje da su isti nerealno iskazani, odnosno isti su iznimno visoki u odnosu na tržišne okolnosti i aktivnosti vijećnika iz ovog organizacionog dijela političke stranke.

- (3) Suprotno odredbama člana 22. Pravilnika o godišnjim finansijskim izvještajima političkih stranaka „BOSS“ Bosanska stranka – Mirnes Ajanović je troškove u iznosu od 69.709,00 KM iskazala kao troškove propagande.

Uvidom u poslovnu dokumentaciju na osnovu koje je politička stranka u godišnjem finansijskom izvještaju za 2011. godinu na obrascu 4-2 iskazala troškove propagande, utvrđeno je da je Glani odbor „BOSS“ Bosanske stranke – Mirnes Ajanović Tuzla od pravnog lica „RINFUZ- PAK“ d.o.o. Tuzla izvršio nabavku: kalendara, rokovnika, olovaka i upaljača u vrijednosti od 69.709,00 KM.

Na računima koje je pomenuto pravno lice ispostavilo „BOSS“ Bosanskoj stranci – Mirnes Ajanović evidentirana je isporuka 21.644 zidna kalendara u vrijednosti od 59.619,00 KM, isporuka 820 rokovnika u vrijednosti od 7.380,00 KM, isporuka 2.600 olovaka i isporuka upaljača u vrijednosti od 2.710,00 KM.

U skladu sa odredbama člana 22. Pravilnika o godišnjim finansijskim izvještajima političkih stranaka, navedene troškove politička stranka nije trebala klasifikovati kao troškove propagande, već ih je u skladu sa odredbama člana 21. istog pravilnika trebala iskazati kao režijsko-administrativne troškove.

Također, „BOSS“ Bosanska stranka – Mirnes Ajanović je osim prethodno pomenutog materijala, izvršila i nabavke kancelarijskog i drugog materijala (645 paketa papira, 48 tonera, 2.190 komada PVC omota, koverata i sl.) od pravnog lica „RINFUZ- PAK“ d.o.o. Tuzla u ukupnoj vrijednosti od 16.003,06 KM, tako da ukupne nabavke političke stranke od ovog pravnog lica iznose 85.712,06 KM.

5.2. PREPORUKE

Preporučuje se „BOSS“ Bosanskoj stranci – Mirnes Ajanović da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da se ne finansira iz izvora koji su političkim strankama zabranjeni Zakonom o finansiranju političkih stranaka,*
- *da u skladu sa odredbama Zakona o finansiranju političkih stranaka uspostavi potpune i tačne evidencije o svojim prihodima i rashodima, te da finansijske izvještaje podnosi u formi koju je odobrila Centralna izborna komisija BiH,*
- *da uspostavi kontrolu ispravnosti i relevantnosti dokumentacije, na osnovu koje vrši isplate sredstva i evidentira troškove, kako se sredstva političke stranke ne bi koristila u druge svrhe osim za ostvarivanje ciljeva utvrđenih programom i statutom stranke,*
- *da uspostavi efikasan sistem internih kontrola i uredi kordinaciju između nižih organizacionih dijelova stranke i*
- *da poštuje i druge propise, prevashodno porezne, iz kojih proističu dodatne obaveze i troškovi, koje politička stranka treba izmirivati i evidentirati u poslovnim knjigama i finansijskom izvještaju koji podnosi Centralnoj izbornoj komisiji BiH.*

KOMENTAR

„BOSS“ Bosanska stranka – Mirnes Ajanović se 08.01.2013. godine, očitovala na nalaz revizije dat u Preliminarnom izvještaju o pregledu godišnjeg finansijskog izvještaja za 2011. godinu, koji je političkoj stranci dostavljen 29. decembra 2012. godine.

Primjedbe na nalaz revizije iz Preliminarnog izvještaja o pregledu godišnjeg finansijskog izvještaja za 2011. godinu, politička stranka nije argumentovala niti je dostavila relevantne dokaze, koji bi uticali na promjenu mišljenja Službe za reviziju, navedeno u preliminarnom izvještaju.

Nalaz revizije ostaje nepromijenjen osim u dijelu u kome se navodi količina kancelarijskog i drugog materijala koji je nabavila stranka, pa umjesto nabavke „više hiljada fascikli“, u Konačnom izvještaju o pregledu godišnjeg finansijskog izvještaja za 2011. godinu navodi se 2.190 komada PVC omota.

U vezi sa molbom, kako politička stranka navodi u očitovanju na Preliminarni izvještaj revizije, da ukoliko Služba za reviziju smatra da treba obračunati doprinose i porez na isplaćene troškove rada stranke, da to napiše i da jedan primjerak konačnog nalaza dostavi Regionalnom odboru BOSS-a u Sarajevu, sugerišemo da se ista obrati poreznoj upravi, koja je nadležna za utvrđivanje iznosa poreznih obaveza.

Mr. Hasida Gušić, šef Službe za reviziju - revizor